

MÉIFODO SAN PABLO CORINTO

IMACIMO ORÉCABE

Segunda Carta del Apóstol San Pablo a los Corintios

Coríntomo ite Juzíñamuimo jaináidinomo Pablo cuete

¹ Páblodicue. Juzíñamui começi jítaina izóí Jesucristo orécamiedicue. Timoteo cue diga illa llezica, Coríntomo ite Juzíñamuimo jainaide ámatiaimo bibe cueticue. Daje izóí Acaya éniemo ite nana Juzíñamuimo dúidinomo bibe cueticue.

² Cai Moo Juzíñamui, cai Ocuíraima Jesucristo diga ómoína ñue éziciteza. Afe llezica ñue uái illano dibénemo Juzíñamui Jesucristo diga ómoína jóoneiteza.

Pablo duere zefuúllafue

³ Cai Moo Juzíñamuina ióbitaredicai, mei afémie caina dúeruite Mooza. Daje izóí afe Juzíñamui iere caimo dúecaifirede. Afémie cai Ocuíraima Jesucristo Moo.

⁴ Nana duere cai zefuúlla llezica, afémie caimo dúecaifirede. Afémie caimo dúecaide, afe izóí jiáie duere zefuúidinomo cai dúecaillena. Afemona Juzíñamui caimo lloga dúecaillafue jiáimacimo llóredicai.

⁵ Mei Cristo duere zefuúllafue dibénemo cai nabaia izóí, afe izóí Crístodo caimo iere ie dúecaillafue jeire óiticaí.

⁶ Ie jira, nibai dama duere cue zefuía, bie ómoína cue canóllena. Iemo nibai Juziñamui cuemo dúecaiadi, áfedo daje izói dúecaillafue, naa jíllonafue diga ótíomoi. Iemona daje cuemo comuide duere zefuíllafue ómoímo comuíadi, raíre járitaiño áfemo fia ocuírírediomoi.

⁷ Omoi dibénemo uáfodo onóigafuemo ñue ñnotícue, mei ñue onódícueza daje zefuíllafue dibénemo omoi illa dieze, afe izói Juziñamui fecaca dúecaillafue ótíomoiiza.

⁸ Amatiai, Asia éniemo cuemo comuide féiredífuiaína ómoímo fidítaiacadícue. Afénomo cuemo comuide riírede facátafue iere jamánomoideza, áfena ocuínidícue. “Níbai bífuemona jíllñoeno benó tíitícueza,” daiífiredícue.

⁹ Aféruimo méinellena llavécamié abi izói cue abi cacaide. Mei íadi tíidino meine abido cáatate Juziñamuimo cue ñnuana cue onóíllena, afe zuufue cuemo comuide. Dama cue abí ññoñeíllena cue llófuete.

¹⁰ Aféruimo Juziñamui afe iere jacírede tíillafuemona cuena jíllotate. Afémie nai birui jaca cuena jíllotaicaide. Daje izói uíreitíruílláido afémie aféfuemona cue jíllotallemo ocuírícaidícue.

¹¹ Uáfúena, cuedo Juziñamuimo omoi jicáfíreíadi afémie cuena jíllotaite. Aílo comíni cuedo Juziñamuimo úriadi, aílo íena íóbitaitiaíoi. Juziñamui cue ézicia ñúefuíaíri íena íóbitaitiaíoi.

Pablo Coríntomo jáiñenafue llote

¹² Daa cue comécido onóigafueri iere íóbidícue. Afefue bie izói jóide: cue comeci úrilla uai nífúenino bíniédo cue mácajana llote. Daje izói

Juziñamui eróicana jíaímana jífueñoeno cue mácaja llote. Omoi cígiri bie izói riire iticue. Juziñamui caimare cue cánuado daí iticue. Dama cue fibíllafuedo daí iñédicue.

¹³ Omoimo cue ciegábiaimo báinino lloga uaina iñede. Omoi facádoia onuille raa ja uáfodo cuega.

Nane jíaífueña ñue omoi onóillemo ocuírídicue.

¹⁴ Aféfuena jabo onódiomoi. Afefue bie izói dáiacade: Cai Ocuíraíma Jesús billíruimo ómoiri caimare abi cue ínua izói, afe izói cueri caimare abi ínoitiomoi.

¹⁵ Nana bífuiaí iere cue jíeruillamona, omoi eróizaillena fueñe mamériticue. Daí ménacaiño omoi cue éroizailleri íobitiomoi.

¹⁶ Macedonia éniemo cue jaille llezica omoi jarire cue méiñonocaillena comeci facádicue. Afe mei Macedóniamona abido cue bille llezica nane dáanomoi omoi cue éroizaillena mamériticue. Afe daí afe méifomo judéamo cue jaille llezica cuena cánoitiomoiza.

¹⁷ Bie cue mamérillaífuiaí comeci cue faca llezica, ¿cuena nibaí jíaífodo raire méidofiredimie izoide daídíomoi? Bie éniemo ite fiénidino mamérilla izói nibaí cuena mamérite daídíomoi. Afémaci “Jii” daídíaíoi; íemo méifodo daje llezica “Dama ite” daíífrediaíoi.

¹⁸ Mei íadi Juziñamui uáfueña daíífredimie illa izói, afe izói táinona “Jii,” íemo “Dama ite” dáaruído ómoína daíífinídíicue.

¹⁹ Mei Juziñamui Jitó Cristo Jesús jaca táinona “Jii,” íemo “Dama ite” dáaruído daíífinideza. Iemo Silvano, Timoteo, íemo cue, Cristo dáina uailaí omoi cígiri lloticaí. Nana Cristo lloga uai táinoñedeza, ua uai. Ie dáinana méidofínide.

20 Mei afémiedo nana Juzíñamui uícodo llogáuai ñue jaícina zúideza. Ie jira Juzíñamuina cai ióbitaja llezica, Cristo Jesudo “Daiítadeza” daiífiredicai.

21 Iemo jiái Juzíñamui ómoína naa cairi Crísto mo riire jaináitate, nana cai ínogafuemoni oni jiáifodo cai báiiñeillena. Daje izói afémie ie táijinafuemo ñue caina jónete.

22 Juzíñamui ie Ñuera Joreño caimo íllado caina dama íeiena mamede. Afe ie Ñuera Joreño caimo íllamona ico jiáiruideo Juzíñamui caimo fecállifueni cai llínollena uáfodo onódicai.

23 Mei jiáifuemo omoi coméciri. Omoína duéruiticueza, ómoína duere cue fínoñeillena, uícodo cue mamérita izói nai ómoimo biñédicue. Juzíñamui afe bie cue uaina nabáillena jicádicue, aféuai uafue daiíllena. Cue daina uai uáfueñenia, Juzíñamuina abí fatátaiticue.

24 Omoi ínogafuena riire ocuíañaédicue, mei omoi ínogafuedo Jesucrísto mo ñue riire jaináidiomoiza. Mei jiáifodo conímamo táijina izói, omoi iere aillo ióbillena ómoína canócadicue.

2

1 Ie jira omoi cue zúucaitaibiñeillena mamériticue.

2 Mei omoi zúucaitadícueni ¿mei bu cuena ióbitalle? Cue zúucaitadino dani cuena ióbitalle, mei íadi cue dinena ómoína zúucaitaacañédicue.

3 Ie jira navi ómoimo cue ciegábemo cue daina izói cueticue. Omoína zúucaitaibiacañédicue. Mei jiáifodo cuena ióbitarediomoí. Mei navi aféruimo uáfueni onódicueza, cue caimare illarui omoi caimare ítiomoiza.

4 Omoimo naui cue orécabe cue cuia llezica, iere cue comeci zúurenari éedicue. Mei íadi omoi zúucaillena afévena cueñedicue. Mei jíáfodo ómoína iere cue izíruillana omoi onóillena cueticue.

Fieni finófiredimie ie illafue múiñua mei, meine caimare uáidua

5 Mei íadi ómoimo riire úriacañedicueza bie izói dáititue. Dámie fieni illa dama cuena zúunaitañedeza, mei jíáfodo cue baimo nana ómoína zúunaitade. Daí daidicue iere ríifuenta jáñeilleza.

6 Omoi gairilla llezica afe cómemo omoi mameca duere finóllifue ja figo báiteza.

7 Mei benómona afémiemo jíáfodo úrirediomoi. Naui ie finoça fiénidifue omoi féitano caimare íena omoi uáidori. Daje izói íena dúcairediomoi, aillo ie zúunaillamona afémie jamánomo anado fieni jáñeilleza.

8 Ie jira ómoimo izire jicádicue, afémie omoi izíruilla meine abido íemo omoi onótallena.

9 Naui uícodo bifue dibénedo ómoimo cueticue. Naui omoi cue llófuiana nibai jeire óitiomoi, nibai jeire óñeitiomoi; áfena cue onóillena ómoimo cueticue. Daje izói, omoi comeci ifue onóillena afébedo ómoína facátaticue.

10 Mei ja benómona, ómoína fieni finódimie omoi caimare uáidoia, cue daje izói caimare íena uáidotitue. Meita afémie fieni finuado cúemona nino féitalle fiénidino íadi, aféfuena féitaticue. Uáfueza ñue ómoína canóllena Cristo eróicana aféfuena féitaticue.

11 Mei afe zúunaitagamie raire abido íena caimare uáidoredicaiza, afe zúufuedo Taife raire íena ana

úinneillena. Mei Taife comínina bífuefirena uaillai ñue onódicaiza.

Pablo Tróasmo uái iñénafue

12 Jesucristo lloga uai Troas jófue mo jino cue lluáibilla llezica, cai Ocuíraima áillomaci cuena jieruitajamona Juzíñamui cue ocuilla tájinafue na uáfodo caimare fuitáredicue.

13 Mei íadi Coríntomona bíacade cue ama Tito afémie cue cióñenamona cue comeci uái iñede. Mei jira Troas imácina facádonocaillano, oni Macedonia éniemo íena jénuaidicue.

Jesucristo mo cai jaináinamona buna anáfenoñegacai

14 Juzíñamuina iere figura daiñiredicai; mei Cristo nana éoidinona anáfenua izói, Juzíñamui dáfeodo, Cristo diga, nágaruillaído caina úicaiteza. Afe llezica ziórede raa caimare jállia izói, afe izói Juzíñamui Crístono onóillifue na caído nágagobiaído jica jalléitate.

15 Cristo Juzíñamuimo fecaca ziórede uguci izóidinodicai. Nana jílloitinomo jallédicai, daje izói niné féiraitinomo jallédicai.

16 Afe niné féiraitinomo titade jucui izói íaire jállecaide. Mei íadi jílloitinomo caimare íocire cáatate jállia izói jállecaide. Bie Juzíñamui ebire mamérrillafue, ¿bífuena bu mei ñue llínorena? Juzíñamui cuena cánua izói canóñenia jaca buna figo llínonide.

17 Juzíñamui uaillai jíáimacimo fécano úcubena llínoñedicue. Afena jaca raiñóñoeno llócaidicue. Jíáimaci úcube óllena afe uai jíáifodo méidua izói méidoñedicue. Mei jíáifodo Juzíñamui orécamié

izói, afémie eróicana jíáima jífueño uáfodo úriticue.

3

Juzíñamui comue ñue finóllifue bie izói daide

¹ Bie izói cue úrilla, ¿ómoimona nie izói cacaide? Nibai ¿dama cue abi ñnollena meine dáanomo ñue úriticue? Mei íadi daíítañede. ¿Nibai cue ñue illánona onótatibiai óómoimo izájirede? Mei nibai jíáimaci finua izói, ¿ómoimona cue ñue illánona onótatibiai jicárede?

² Mei daíítañedeza. Dani omoi cue ñue illánona onótatibe izóidiomoi. Omoi baimo jíáie onótatibena jítaiñedicue. Cue comécimo joide come ñue illánona onótatibe izóidiomoi. Aféuaina nana comini cúemona onórediaioi.

³ Dama Cristo cuela onótatibe izóidiomoi. Cuedo ciegábai izóidiomoi, mei cuedo ñúefuena llotátagaomoiza. Jamai tintado ciegabe izóiñediomoi; mei jíáfodo caade Juzíñamui Ñuera Joreño do úicaiganodiomoi. Daje izói Moisés nofícomo ciegáuai fia comini eróicana jeire oñediomoi, mei íadi omoi comeci úrillado Juzíñamuina ióbitaacadiomoi.

⁴ Nana afe bie ñuera cue dáinana jacíruiño daíiredicue, mei Crístodo Juzíñamuimo daa uai fiéño ñnofíredicueza. Uáfueza, nana cue dáinana afémie óómoimo zúitaiteza.

⁵ Mei íadi nana cue jetáacagafuai finolle riino dama cúemona comuíñedeza; mei jíáfodo nana cue finócafuii Juzíñamuimona comuide.

6 Ie lloga comue finóllifue mo cue táijillena, afémie ñue cuena ríinoretade. Afe Juzíñamui comue finóllifue, jai ai cueba ocuícáfue jeire cai úado caimo zuitánide. Mei jáífodo Ñuera Joreño comuítaga cai comeci zíñona cáatativo caimo íllado, Juzíñamui comue finóllifue caimo zuitárede. Afe cueba cai ocuilla uai cai titállena llote, mei íadi Ñuera Joreño cai comécina cáataite.

7 Afe Moisés lloga ocuilla uai nofici finóinabícimo cueba. Aféuai lluíbilla llezica, iere riire ebíredifuiado lloga. Aféruido Israel nairai, mei Moisés uíeco jáífodo iere quenire eróideza, afémiemo eróinidiaioi. Mei íadi afe riire ebíredifue fíaicana dúioicaide. Iemona afe ícoimo cai titalle ocuilla uai lluíbilla llezica iere ebíreia,

8 Ñuera Joreño caimo lluíbiga uai, ua afe titade uai baímo jamánomo ebírede.

9 Bífue bie izói dáiacade: mei cai fíenidifuiamona cai titállena llote ocuilla uai iere ebíreia, birui aféuai baímo nífunino cai íllena Juzíñamui llogafue jamánomo ebírede.

10 Afe ocuilla uai nau iere ebírede, mei íadi Juzíñamui como finoca jamánomo ebíredifue comuíllamona, afe nanoide ocuilla uai jae figo ebínide; ja birui ráañede.

11 Iemona nau lloga are íñeno raire záitífue ebíredenia, afe zíñona záíñeitífue nau llogáuai baímo jamánomo ebírede.

12 Ie jira afe bífue mo ocuírillano, jacíruiñeno caimare úriticue.

13 Mei íadi cue bie Moisés fínua izói finóñedicue. Afémie uíeco quenire cioina are íñe deza féibicaide.

Ie jira afe quenire cíoide dúillana Israel nairai cíoiñeillena, Moisés ie uiéco iníroina ibaide.

14 Mei íadi dama Moisés uiéco ibaina llezica afe nairai, uina cíoiñedino izói, íaioi ifoci úrilla figo déiñede. Birui afe jaijai llogafue íaioi facádua llezica, afe ibaille iniroi izóidifue íaioi onóillifueña jánaide; mei afe ibaille iniroi izóidifue nai oni óñegaza. Afe jízítatifue dama Cristo oni órede.

15 Nai biruimo Moisés cuezánicuai íaioi facádoia, afe ibáiraroi íaioi ifoci úrillana fêitaoicaide.

16 Mei íadi dáamie cai Ocuíraimamo íinoia, afe ibáiraroi oni oga.

17 Cai Ocuíraima afe íaioina zíiñona cáatate Ñuera Joreño. Afe ie Ñuera Joreñomo jíeruitimie fiénidena ínuamona ráiruiñegamiena jáite. Daje izói afe Ñuera Joreñodo cai Ocuíraimamo íinote come, Moisés ocuica uáimona ráiruiñegamiena jaide.

18 Mei íemona cai uiéco ibáillaroi izóidifue inédeza, uáfori cíoide acárani izóidinodicai. Afemona, cai Ocuíraima ebíredifueña acárani egáíñua izói, jíaimamo ja cíótaticai. Afe daíí cai bie Cristo izóioicaidicai, mei nágaruillaído ie ebíredifueña jamánomo náamatafiredicaiza. Bifue cai Ocuíraima finócafue. Afémie Ñuera Joreño.

4

1 Afemona cue bie jaca comécina náinidino izóiñedícue, mei Juzíñamui cuena dúecaillano bie táijnafue cuemo jóoneteza.

2 Báinino jíáima jífuefirenana ruifíruitícue naa jíáie meáiredífuiairi. Daje izói jíáima caimare bífuia uaido úriñedícue. Afe llezica Juzíñamui uaina

méidota jíáifodo lloñédicue. Mei jíáifodo jaca uáfuedo úriticue. Afedo Juzíñamui eróicana nana comini comeci ñue úrillado afe cue lloga ua uaina íaioina jíeruitadicue.

³ Mei íadi cai llócaiga jíllona uai comínimona nano nígamiamo nai ónonino cacaide. Afefue daíí ite, mei afémaci dani nine íaioi táinocaillifuemo jáideza.

⁴ Mei afémaci Juzíñamuimo íñoñenamona bínie naama Taife, ui nirilla izói, íaioi ifoci úrilla uaina féitate, cue lloga comini jíllotate ebírede Cristo ñúefuena íaioi ónoñeillena. Afe ñúefue ñue úzere egáiñote raa izoide. Iemo afe Cristo Juzíñamuina jino uáfodo ñue onótate cáadímie.

⁵ Jino cue llócaina llezica, dama cue abi íena lloñédicue, mei jíáifodo afe Jesucristo cai Ocuíraima llócaidicue. Iemo cue dibénedo Jesuna cue izíruillamona ñue omoí íllena canódímiedicue daíífredicue.

⁶ Mei Juzíñamui énie comúitaja llezica, afémie “Mai batí jíitino egáiñuairi” daide. Afe daíí daídímie, cue comécimo ie ñúefue egáiñua izói jóonete. Afémie daíí cuemo jóonete, Crístodo cuemo ácataga Juzíñamui ebírede cáimafuena ñue cue onóillena.

Juzíñamuimo ñue cai ínuado cai illafue

⁷ Mei íadi afe Juzíñamui ráifide cáimafue cue zíñona íñeite abido onótagacue. Bie cue abi are íñeite énie niina iciru izoide; mei íadi afe ñúefuena méidotarede íno bie cue jamai abimo jóonega, afe ríino dama cúemona comuíñenana omoí onóillena; íemo jíáifodo afe ríino Juzíñamuimona comuíllana omoí onóillena.

8 Daií cue íllamona dîga féirede finónidifuiái cuemo comuíadi, jaca Juzíñamui cánuado aféfuíai ñúeite. Daje izói aillo ónonidifuiái zuure cuemo comuíadi, jaca nai ocuírîñedîmie izói îñédîcue.

9 Mei jíáimaci cuena duere finóllena cuemo racáadi, jaca zóofeñegacue. Fáinamona ana dotaca izói itîcúe íadi, jaca niné táinocaiñedîcue.

10 Náganuiaimo cue jailla llezica, Jesús íaioí fállena mámia izói maméfiregacue. Nágaruillaído afe titállena mamécamié izói cue illa llezica, afémie ñue cuena náiretade, birui ie cáananona jino comínimo cue onótallena.

11 Mei nai cue caana llezica, nágaruillaído Jesús ícoinia jacire titállena mamécacue, Jesús cáanana, are îñeno tíite cue abído cíotafireillena.

12 Daií cue zefuíllamona cue dibénedo títaigamiéna jáitîcúe, mei íadi omoí dibénedo dáaruido omoí cáataganona jáitîomoi.

13 Juzíñamui Cuegáuaimo dáamié duere ie zefuíbicailla llezica daide: “Juzíñamui ñnotîcúe ie jira úritîcúe.” Mei daií cue jíái afémie îñua izói ñnotîcúe, ie jira Juzíñamui ñúefuedo úritîcúe.

14 Ñue onódîcúeza, afe tíide Cristo meine abído cáatate Juzíñamui, afe cáataga Jesúsóiri nane cuena cáataite; íemo daane cue, naa ómoíri, ie illánomo úite.

15 Nana bífuíai ñue omoí íllena daií íficaide. Iemona nai aillo jíáie comínina Juzíñamui ñue ézicîite. Aillo ie ézicia izói afe dieze aillo comínî jamánomo ñúefue íemo nítaítiaioí.

16 Mei íemona cue jaca comécina náinidîno izói îñédîcue. Meita cue abi náinioicaide íadi, cue

comeci dinena jaca nágarui náireioicaide.

¹⁷ Mei íemona bíniemo cue caana llezica duere cue zefuállafuiai figo ráañede. Raire llícaite. Ie méifomo afe zuufue baímo ite aillo ninomo fúíñeite ebírede cáimafuiai cuemo cómuite.

¹⁸ Ie jira uído cue ciónamo ébicaiñedicue; mei íadi cue cióñenafuiaiimo ébicaifiredicue, mei afe ciona raana are íñeno raire táinocaiteza. Mei íadi afe cióñena raa jaca zíñona íite.

5

¹ Ja ñue onódicueza, cue caana abí are íñeno zabide jofo izoide. Iemo jíái onódicueza, bie cue abí táinocaille llezica, Juzíñamui cúeiena monamo zíñona zábiñeítico ja nite; afecho come ónoído níñega.

² Uáfueza, cue caana abído cue illa llezica, monamo itícomo iere cue jáiacana comécido ééfiredicue.

³ Afénomo jaiániacadícue, mei afecho iniroi come abí jífua izói, cue joréñona ñue jífoiteza. Afemona come abímo íñede joréñona íñeiticue.

⁴ Bie jofona mameca abímo cue illa llezica iere zúunaillano comue abína izire óiacadícue. Mei, bie cue jácaie abína, iniroi come abímona duiñua izói, cue joréñomona duiñóacañedicueza; jífoñega joreño izói íacañedicueza. Mei jíáfodo iniroi jíta izói, comue cue abí cue joréñomo jítáacadícue. Daí cómuena méidoacadícue, bie cue táinocaite abí, comue cue cáaillinodo nñe féitallena.

⁵ Dama Juzíñamui bie izói abí cue méidollena cuena mamede. Iemo birui ie Ñuera Joreño afémie cuemo fecade. Afe ie Ñuera Joreño cuemo íllado

ñue onódicueza, nana Juzíñamui cuemo fecalle ñue llíinoiticue.

⁶ Mei áfemona, comue méidoga abi cue llíinollena áfena ñue cue onónamona caimare ocuáridicue. Nai bie abido cue illa llezica, onódicueza, monamo cue illícomona jino iticue. Bie izói daina cue Ocuárima diga iñédicue.

⁷ Afe llezica birui fia cue ciónafuedo ínidicue, mei jíáfodo Juzíñamuimo cue íinogafuedo íredicue.

⁸ Mei jira uáfuenta cue llíinollena ñue cue onónamona caimare ocuáridicue. Bie cue illa abina fáicanocaiacadícue, monamo jaillano cai Ocuárima diga cue íllena.

⁹ Ie jira bie éniemo afémie diga cue iñena llezica, daje izói afémie diga cue illa llezica, jaca íena cue ióbitallena jamánomo nícidoticue.

¹⁰ Mei comini finócafue Cristo riire jicánoranomo nana cai afénomo ácataredicaiza. Afénomo illa dígamie bíniemo illa abido íaioi finua dieze, nibai ñúefue nibai fiénidífue, áfeze jirídoitiaioi.

Juzíñamui meine caina caimare uáiduafue

¹¹ Ie jira afe naga come Juzíñamui riire jicánollemo ñue jacíruioicana comeci facádícue. Afemo cue comécíillamona naga cómena Juzíñamui llógamo jíeruitaacadícue. Mei íadi cue illáfuenta Juzíñamui onode. Afe izói cue ñue illáfuenta omoi onóillemo ocuáridicue.

¹² Dáanomo dama ñue cue illáfuedo úriñedicue. Mei jíáfodo cuedo caimare omoi úrillena bie izói ómoína daidícue. Afemona jínoidífuedo abí íinotino uai omoi ollíuai íteza. Afémaci jofó comécimo itífuenta náfueñediaioi.

13 Mei nibai comínimona dáarie cuena daina izói, uáiritaidimie izói iticue íadi, Juzíñamui íena daií iticue. Mei jáífodo uáiritaiñedicueza ñue omoi íllena canódicue.

14 Mei ñue onódicaiza dama Cristo dainámie nana comini meífomo tíide. Afe caina ie izíruillamo comécillano, nana afémiemo ínotino íaioi fiénidifuiái tíidena mámano áfena fáicanocaidiaioi. Afemo cue comécillado Cristo caina izíruilla ñúefuena cuena izire llócaitate, ñue omoi íllena. (Daje izói bie Cristo caina izíruilla, ñue illáfuedo cue jáillena cuena ocuíoideza.)

15 Uáfueza, Cristo nana comini meífomo tíide, nana cáadino dani íaioi jitailla izói íñeillena; mei jáífodo, afémaci dibénedo tíillano meine cáadimie Cristo comeci jitailla izói íaioi íllena.

16 Ie jira bínie comini jínoidifuedo comeci faca izói, nino bumo comeci facáñedicue. Mei nauí uícodo Crístomo bínie comini comeci faca izói, comeci facádicue, mei íadi ja birui daií afémiemo comeci facáñedicue.

17 Mei daií, Crístomo dájena jaináitagamie comue cómena jaide. Jaiái ie illáfuiái fiénocaillano nágaíuiái cómofuiaina méidoga.

18 Nana bífuiái Juzíñamui mámiamaona Juzíñamui dama afémiemona Crístodo meine caimare cuena uáidote, íemo jáíi nana comini afémiemo meine caimare úritallena cuena ocuínocaide.

19 Bie izói daiíacana: Juzíñamui ie Jító Crístodo nana comínina íena meine caimare uáidotade. Aféruimo, comini finoca fiénidifue féitano caimare íaioina uáidote. Afe dáruido Juzíñamui meine comínina caimare uáiduafue oni lluájillena cuena jóonenocaide.

20 Afemona Cristo íena uai llotínona ómoimo biticue. Ie jira birui ómoína cue daína uai, dama Juzíñamui ómoimo cuedo jicaca uai izoide. Mei jira Cristo dibénedo ómoimo izire jicádícue. Mai, meine abído Juzíñamui caimare uáidori.

21 Afe Cristo jaca íaifuena finóñede. Mei íadí cai meífomo Juzíñamui afémiena fiénidífuiairedimie izói duere finode. Daí íena finode, Juzíñamui anamo ñue jaícina illáfuemo cai íllena; mei ie ñue illa izói cai íllena Juzíñamui jitáideza.

6

1 Afe daí Juzíñamui tájinamo afémiena nabáidícue. Ie jira afémie ómoimo lloga ñuera cáimafuiai táinomo omoi fáifitaño iri.

2 Mei Juzíñamui ie Cuegáuaimo daide:

Comínimo caimare cue uáidollena cue mamécaruimo ona cacádícue.

Daje izói jíllonaruiimo ona canódícue.

Ja birui Juzíñamui caimare o uáiduarui. Daje izói birui o jíllonarui.

3 Iemona Juzíñamuimo cue tájina llezica, buna llótaidonidícue, cue tájinafuemo fiéni íaioi úriñeillena.

4 Mei jíáfodo nana cue jetáacagafuiaido Juzíñamuimo tájidimie cue íllana ácataacadícue. Duere zefuídícue íadí comécina raire járidoño fia ocuídícue. Afedo Juzíñamui íena cue íllana jino ácatatícue. Daje izói cue jitaica raa íñena llezica, íemo llotáiredífuiai cuemo comuilla llezica áferi járidoño ocuídícue.

5 Daje izói cuena zechénuano llavédiaioi. Cue duere finóllena jacire lléjellejedino cígiri iticue; íemo

iere riírede táijinamo iticue. Diga ícaíño raire íniana onóñedicue; daje izói jiái jufíruiticue.

⁶ Daje izói íáinidimiena cue íllado Juzíñamuimo ñue táijidimiena cue íllana ácataticue. Iemo diga jiáifuiado daií cue íllana ácatafiredicue. Uafue uaina cue onónado ñue cue illáfueña cíotaticue. Iemo cue járitañenafuedo naa cue dúecaifirenafuiado áfena cíotaticue. Iemo jiái Ñuera Joreño cuemo íllado, naa jiáimana jífueño cue izíruifirenado Juzíñamui íena cue íllana ácatafiredicue.

⁷ Iemo ua uai cue llócaillado, naa Juzíñamui riíno cuemo íllado: nana bífuiado Juzíñamuimo ñue táijidimiena cue íllana ácatafiredicue. Afe llezica jaícina joide illáfuedo jáifiredicue, mei áfedo fiénide uáillana oni caitáredicueza. Daje izói áfedo cue abina riídoredicueza.

⁸ Daruírie ñúefuiái cuemo nitádiaioi, mei jiáiruido fiénidifue cuemo jitádiaioi. Daje izói jiáiruido cuedo ñue úritiaioi, íemo jiáiruido cuena íáiruitiaioi. Iemo dárie cuena comínina bífuetimiena daidíaioi; mei íadi jaca uáfueña úricaidimie iticueza.

⁹ Iemo dárie cuena “Bu ónoñegamedio” daidíaioi; íemo jiáimaci “Ñuera cai cómedio” daidíaioi. Daruírie titácamié izói iticue, íadi nai cáaoicaidicue. Iere duere finócacue íadi méineñegacue.

¹⁰ Zuure iticue íadi jiáifodo jaca íóbidicue. Mei ráanidimiedicue íadi, aillo jiáimacina ráaredino izói ráanaitadicue. Dúeredino jofófemo dúeredimie izói cue íadi, nai ráaredimie izói nana ráaniairi íóbidicue.

¹¹ Coríntomo ite cue ámatiai omoi cacai. Omoi diga báinino úriñedicue, jaca uáfodo úrifiredicue. Cue comécimo itífuenta uáfodo jino ómoimo lloticue.

¹² Omoína iere duéruillano rairuíñeno ómoína caimare uáidofiredicue. Mei íadi omoi dínena cuena ñue izíruillana ráiruiti omoi.

¹³ Urue Moo, ie úruena izire jica izói, afe izói ómoína izire jicádicue. Omoimo uáfodo jino cue llua izói, afe izói omoi comécimo itífuenta jino uáfodo cuemo omoi llóllena izire jicádicue.

Caade Juzíñamui illaco izóidicai

¹⁴ Juzíñamuimo íñoñedinomo dájena omoi jaináíñeno iri. Omoi jaináidi, dájena jaícina iñénafue comuídeza; ómoína jiáifodo itátaite. Mei ¿nie izói jaícinaidifue fiénidifue diga dáanomo jaináirede? ¡Jaca jaináinide! ¿Mei úzefo naa jítifo diga dájena nabáirede? ¡Nabáinide!

¹⁵ ¿Taife meita Cristo diga dájena caimare írede? ¡Jaca ínide! Juzíñamuimo ínotino íñoñedino diga ¿níifue dájena íaioimo dúina? Dáanomo dúitífue iñede.

¹⁶ Mei dama Juzíñamui daina izói caade Juzíñamui illaco izóidí omoi. Afémie daide: Iaioimo ítiticue; íaioi cígido macácaiticue. Cue be íaioi Juzíñamuiticue.

Afe izói cue comínina ítitiaioi, daide.

Iemona Juzíñamui illaco jánarai diga ¿níifue dájena íaioimo dúina? Dáanomo dúitífue iñede.

¹⁷ Ie jira cai Ocuíraima bie izói daide:

Juzíñamuimo íñoñedino cígimona oni omoi jai, afénomona oni omoi íi.

Íaire ðifuiái ðibénemo iñeno iri.
 Iemona ómoína caimare uáidoitícueza.
 18 Afe llezica omoí Móoitícue.
 Iemo dáaruido omoí cue úruiaína íitíomoi.
 Afe bífuena jamánomo rírede cai Ocuide
 Juzíñamui daí daide.

7

1 Cue izíruiga ámatíai, Juzíñamui jaiái uícodo lloga cáimafuiái bie izóí joide. Afe daí caimo íllamona nana jíáíforiede cai íaifuiáimona muiñócana izóí oni íredícai. Abí íaifuena daje izóí cai joreño íaifuena fáicanocairedícai. Juzíñamuina ñue jacíruillano cai comeci íaininafue ie eróicana jaícina jóneredícai.

Corintio imaci comeci méidua

2 ¡Mai cuena caimare omoí uáidori! Cue bie jaca buna fieni finóñedicue. Daje izóí buna íaire finóñedicue. Iemo ómoímona jaca buna jífueñedicue.

3 Bie izóí cue dáinado ómoína íaire finótañedicue. Mei nauí ómoína cue daína izóí, nai cue caana llezica, nágarui ómoímo cue comeci fáioidícueza. Uáfuena dájena cue tíllíruimo ómoímo cue comeci fáioidícueza.

4 Ómoína iere caimare íinotícue; daje izóí ómoíri ñue abí íinotícue. Iemona diga duere zefuíllafue cuemo comuilla llezica cue comeci jaca náirede, íemo jíáí jamánomo caimare itícue.

5 Mei daí nauí cuemo comuídeza. Nauí Macedonia éniemo cue jailla llezica afénomo uái cue illíruí jaca iñede. Mei jíáífodo náganuíaido

féiredifuiái cuemo comuide. Cuena uáitatino nágafene cue ciríoidiaíoi, íemo diga jíáfuiáiri comécido jacínaioicaidícue.

⁶ Mei íadi comécina náinidinona náicaitafirede Juzíñamui cuemo dúecaide; cuemo dúecaillano Tito dúcinado ñue cuena náicaitade.

⁷ Daa ie dúcinari íóbiñedicueza, mei dáanomo omoi méidoga ñue illáfuedo afémiena omoi náicaitari íóbídicue. Afémie omoi iere cuena cióacanafue cuemo llote. Iemo jíái nauí omoi cígimo comuídfueri omoi iere zúunailana Tito llote. Daje izói cueri omoi comeci lílícitallari, naa cuemo omoi jíeruianari íóbídicue. Bífuiaina cue fidínamona jamánomo íóbídicue.

⁸ Mei nauí ómoímo cue orécabe ómoína zúucaitate íadi, biruí áferi zúucaíñedicue. Mei níbaí nauí áferi zúucaidícue, mei íadi biruí Tito cuemo llua izói afebe are ómoína zúucaitañenana fidídicue.

⁹ Iemona biruí íóbídicue. Omoi zúucaillari íóbiñedicue, mei jíáfodo afe omoi zúucaillafuedo omoi comeci ífuea méiduari íóbídicue. Bie zúucaillafue ñue omoi ocuíllado Juzíñamuina íóbitade. Iemona ómoímo ríire cue ciegabe ómoína fieni finóñede.

¹⁰ Mei uafue, Juzíñamui íóbilla ñue caí ocuíoiga zúucaillafuiái caí comeci ífue ñúefuea méidotade. Iemo afe ñúefuea méiduoado jíllóiticaí. Mei íadi bíniemo ite ínoñedino zúucaillafue íaíoína ana tíllinomo úite.

¹¹ Omoímo comuide zúucaillafue ñue omoi ocuíllari Juzíñamui íóbide. ¡Iemo biruí omoi cígimo ñue comuídfuiáimo omoi éroi! Afe zúucaillafue nauí ómoímo ite fiénidífueo ríire ómoína ñue comécitade. Iemo afe zuufue omoi finoca

fiénidifuena jino uáfodo llotátate. Daje izói afe zuufue daní ómoína ríicaitade; íemo ómoína jacíruitade. Afe méfomo iere cuena cióacadiómoi. Afe llezica omoi cígiri ite fiéni finódimiēna duere finótaiacadiómoi. Nana bífuiaimo omoi nífuēninana jino ñue ciótatiómoi.

¹² Mei daií afe orécabe cue cuia llezica afe fiéni finódimiēmo figo coméciñedicue. Daje izói duere zefuídimiēmo figo coméciñedicue. Mei jíáifodo ñue omoi illífuemo coméciidicue, cuemo omoi comeci ñue fáiana, Juzíñamui eróicana, omoi onóillena. Ie jira afebe ómoimo cuetícue.

¹³ Iemona bífuiaido cuemo caimare dúecaídiómoi.

Mei íadi omoi cuemo dúecailla baimo Tito iere caimare íllari jamánomo ióbidicue. Mei nana omoi afémie ñue uái íllena íena canódiómoiza.

¹⁴ Naui omoi dibénedo Títomo cue úrilla uai meáiruiñeno jaca ñue cuemo baite. Omoi ri abi cue ínuana afémiēmo llotícue. Ja birui, nana ómoína cue daína uai uáfuenta jailla izói, afe izói omoi ri Títona cue daína uai uáfuenta jaide. Iemona naui afémiēna cue daína uai táinomo omoi fáifitañenari iere ióbidicue.

¹⁵ Ja birui Tito ómoína iere izíruite, mei nana ómoimo ie dáinado cue ocuícafuiai jeire omoi úamo afémie caimare uibíoideza. Daje izói jacíruioicana caimare ie omoi línuamo nai comécioidē.

¹⁶ Iemona ómoína jaícina ñue cue ínuari ióbidicue.

8

Jeruíñeno fecáredicai

1 Amatiai, birui Macedonia éniemo ite Juziñamuimo jaináidinomo afémie dúcaifirenamona íaioi jeruíño dígaa raafecáfirenafue ómoimo llóiacadicue.

2 Mei íaioimo comuide féiredifuiái iere íaioina jacire facátate íadi, caimare itíaioi. Daje izói iere duérediaioi íadi, ráaredino izói raana jeruíño fecáfirediaioi.

3 Mei daní íaioi comeci ñue jítaina izói nana íaioimo ite dieze jeruíño fecádiaioi, íemo afe íaioi írede úcube baimo nane fecáfirediaioi. Aféfuemo uaina nabáidicue.

4 Bie Macedonia imaci Judéamo ite ámatiai íaioi canóllena cuemo izire jicádiaioi.

5 Íaioimo comeci cue faca baimo fecáfirediaioi; mei fueñe Juziñamui comeci jítaina izói, “Juziñamui ocuilla raire fínoitícaí,” dainano aféniemo ñue ñnotiaioi. Afe mei daje izói “O ocuilla raire fínoitícaí,” cuena daidíaioi.

6 Afémaci daíí daína jira, Títomo izire jicádicue, afémie nauí omoi cígiri taineca omoi jeruíño fecaca úcube iráiafue birui ñue ícoimo fuitállena.

7 Mei nágaíuiai dibénemo iere ñue finódiomoi: ñnogafue dibénemo jamánomoidiomoi. Iemo ñue llófuiana jamánomo baitádinodiomoi, naa ífoci úrillafuiári. Daje izói ráiraieño íocirenafue dibénemo jamánomoidiomoi, naa cuena omoi izíruillafueri. Daíí omoi íllamona, mai bie jeruíño raana fécafue dibénemo daje izói jamánomoidinona omoi iri.

8 Bie fécafueña ómoína finótañedicue. Daa jíaimaci raire raana fecáfirenafueña omoi onótaacadíicue, áfena omoi fidínamona íaioi

feca dieze raire omoi fecállena. Afe daií raire omoi fecáacanado omoi izíruillafuena jiái uáfueña dáiti omoi.

⁹ Mei cai Ocuíraima Jesucristo caimo dúecaillana ñue onódi omoi za. Afémie fueñe monamo illa llezica bínie comini ráanailla baimo jamánomo ráaredimie. Mei íadi bíníemo bíllamo caina izíruillano dama abina dúeredimiena finode, ie dúerenado Juzíñamui dibénemo caina jamánomo cai ráanaitallena. Mei uáfueña, nauí Cristo monamo illa izói, afémie caina itátaiacade.

¹⁰ Bie jiáimacimo fecáfírenafue dibénemo omoi ñue íllena, cue comécimo ite cue fácaja ñuera uai llóiticue. Nauí jaide fimónamona nai biruimo afe jeruíñeno fécafuena ñue tainédi omoi. Daa due jiza fécaítino izói, tainéñedi omoi, mei jiáífodo íocire caimare fecáfíredi omoi.

¹¹ Jira benómona mai ñue ícoimo omoi fuitari. Nano fueñe omoi táinia llezica, omoi íocire caimare fecáfírena izói, afe izói áfena ñue ícoimo fuitari. Omoimo ite dieze, jeruíñeno fecáfíreiri.

¹² Dámie uáfueña Juzíñamuimo fecáacania, afémie Juzíñamuimo fecaca raa Juzíñamui caimare llínoite. Mei uáfueña comínimo ite dieze Juzíñamui caimare llínofiredeza. Afe baimo cómemo íñédena afémie táinona jicáñede.

¹³ Jiáimaci omoi canófírenado ómoína dúeredinona finócañedicue.

¹⁴ Mei jiáífodo illa dígazie dájerize omoi ráareri, daidicue. Jiáiziena jamánomo baimo ráareri, daiíñedicue. Birui íaioi jitailla raana omoi ñue fecáredi omoi. Iemo uire omoi jitáilliruimo omoi jitailla raana afémaci ómoimo fecárediaioi. Afe

bie izóidemona afémaci naa ómoiri jaícina dájerize ráareitio moi.

¹⁵ Jai ai afe monámona Juzíñamui oreca maná daina pan izóidena dibénedo Juzíñamui cuezáuai daje izói daí dáideza: “Aillo ofítati miemo minícana fiébiñede. Iemo figo ofítañedimiemo ie jitaica raana iñede.” Iemonana nana dájerize ráareitio moiza.

Tito naa ie nabáñiairi

¹⁶ Ja jáinodo Juzíñamuina “Figora” daí firedicue. Mei omoi ñue íllena ómoimo cue comeci úina izói, afe izói Juzíñamui Tito comécina ómoimo jóonetadeza.

¹⁷ Afémiemo cue jóonenocaigana afémi ñue jíeruite. Iemo dama ie comeci ómoimo járitaifrenamona, ja birui dama ie comeci jítainado omoi eróizaide.

¹⁸ Tito diga daa ñue mámecina jica jalléidimiena orédicue. Nana gairífirede Juzíñamuimo jáináidinodo ie mámecei jica jalleide. Jíllona uaimo afémi iere ñue táijinado ie mámecei jica jalleide.

¹⁹ Daa bífueñedeza, mei jáífodo Juzíñamuimo jáináidino afe bie cai ama nizédiaioi cue diga jáillena. Daje izói cue canóllena afe ñue ínotimiena nizédiaioi. Afe jáímacimo omoi dúecaille úcube cue fecállemo afémi cuena cánoite. Cai Ocuíraimamo ñuera uai nitállena bie izói finódicue. Daje izói íemo jáí omoi íocire comínina canóacanana ácatallena, bie izói mamédicue.

²⁰ Bie úcube cue iráiamo buna fieni úriñeillena bie izói finódicue.

²¹ Bie izói ñue jaícina uáfodo canóacadicue, Juzíñamui eróicana ñue cue íllena. Dama Juzíñamui

eróicana daíí iñédicueza, daje izói jíái comini eróicana daíí iticue.

²² Afe íaillinoído jíáie cai izói ínote ámatiaimona dáamie orédicai. Afémie íocire ie mamérellana diga jíáfuiáido ácatate. Iemo birui ómoimo iere ñue ie ínuado, ie íocire mamérellana jamánomo jino ácatate.

²³ Daa come “¿Mei bu Títona?” daííadi, “Jadíe omoi cue cánuamo cue nabáifiredimie,” omoi daííri. Iemo afe Títodo jaide íaillinoímo comini jícanoíadi, “Crístomo jaináidinomona orécaiaillinoí,” omoi daííri. Afe llezica “Bie come íaillinoí ñúefue Crístomo nitáfirediaillinoí,” omoi daííri.

²⁴ Iemona bie oreca íaioímo, uáfueña íaioína omoi izíruifirenana ñue íaioímo ácatari, nana Juzíñamuimo jaináidino onóilleza. Afe izói bie orécamaci ñue omoi llínuado, ómoído abí cue ínuana, uafue daítaitiomoi.

9

Amatiai íena úcube iráica

¹ Juzíñamuimo ínotino, cai ámatiai izóidino íaioíena úcube iráia dibenedo, ómoimo uáfueña cúenidicue,

² mei omoi fecállena raire mamérfirenana ñue onódicueza. Omoi Acaya énie imácidiomoi. Nauide fimónamona omoi fecalle raamo raire mamérfirenana Macedonia énie comínimo jaca caimare llófredicue. Macedonia comínimona nabézie, omoi íocire mamérellana fidíillamona comécido náicaidiaoi.

³ Mei íadi bie úcube iráia dibenedo ómoído cue lloga ñúefue táinomo fáifíñeillena, bie cai ámatiai

ómoimo orédicue. Daií íaioina uícodo orédicue, nauí cue daina izóí áfemo ñue omoi finóbillena.

⁴ Macedonia imácimona dáríe cuedo jaiá, nai omoi finóbiñenana baizájillena gáñedicue. Daií omoi íllana íaioi baizájiadi, afe cuena meáidaitade, mei áfedo nano uícodo omoi ñue cue ínuana táinomo fáífitaitiomoiza. Iemo jiái afémaci daií omoi íllana cíocaizaibiadi daje izóí dani ómoína meáidaitaite.

⁵ Afe biemona nano uícodo ómoimo bie cai ámatiai cue orelle iere jítáiredeza, daií comeci facádicue. Iemo daje izóí afémaci nauí uícodo omoi mameca aillo úcube iráiana ñue ícoimo fúitana cánoitiaioi. Bimaci omoi cánuamona afe úcube iráiana fúitano, afe úcube caimare omoi fecállemo ñue finóbitiomoí. Iemona afe omoi fecalle cue riire ocuínidicue. Dani omoi comeci ñue jítainana ácataitioí.

⁶ Ja cue llollífuemo omoi uibíoiri. Due ritímie jaca due jofu ote. Iemo daje izóí aillo ritímie aillo jofu ote.

⁷ Ie jira illa dígamie ie comeci caimare mamérilla izóí ie úcube írede. Jeruíllano éoinamona fecánide. Daje izóí jiáima ocuíoillamona ínide. Mei Juzíñamui caimare fecáfiredimiena izíruiteza.

⁸ Cai Moo Juzíñamui nana jiáifoide omoi cáimacaitade ráaniai iere aillo íteza, facádoñeno jamánomo ómoimo fecárede. Daií nana dani omoi jitaica ráaniaina ómoimo nágarui ífireite. Mei íadi dani ómoieñedeza, mei jiáífodo ómoimo aillo ite ráamona, nana jiáíforiede raado jiáímacina jeruíñeno canóredíomoi.

⁹ Juzíñamui Cuegáuai bie izóí daide: Dúredínomo afémie jeruíñeno aillo fecade.

Comínimo afémie ñue finócano jaca are iite.

¹⁰ Iemo afe daade Juzíñamui omoi ríllena jiáie ríamo llizítano ómoimo fecáfirede. Daje izói afe riga zícua mona, Juzíñamui áfemona omoi güille raana comúitano ómoimo fecáfirede. Iemona nana omoi jitailla ríllena afémie ómoimo fécaite; iemo dáanomo omoi rigánuiaina jamánomo aitátaite; áillamona jamánomo aillo óitiomoi. Daií omoi jamánomo óllemona jiáimaci canolle raa diga icaiño ómoimo íteza.

¹¹ Afemona diga jiáiforiedena ráareitiomoi, jiáimacimo jeruñeno aillo omoi fecáfireillena. Iemo cue uire omoi orelle úcube cue izájillamona jiáie cai ámatiaina Juzíñamuina “Iere figura” dáítaite.

¹² Mei jira afe bie cánua Jerusalemo ite cai ámatiaimo cai feca llezica, daa íaioi jitaica ráaniai íaioimo fecáñedicaiza, mei íadi afémacina Juzíñamuina “Iere figura” daítaticai.

¹³ Iemona dani afémaci Juzíñamuido ñue úritiaioi, mei bie cánua Cristo ñuera uaina omoi jiéruillana íaioimo jino ácatate. Daje izói afémacimo íemo naa jiáimacimo jeruñeno aillo omoi fécajana íaioi ciónamona, Juzíñamuimo ñuera uaina jóneitiaioi.

¹⁴ Iemona ómoina iere duéruillano, afémaci afe íbana ómoiena Juzíñamuimo jícaitiaioi. Juzíñamui ómoido jino cíotaga aillo dúcaifirenamona afémaci ómoido Juzíñamuimo úrifireitiaioi.

¹⁵ Ie jira Juzíñamui afe caimo lloga áillo dúcaifirenana jamánomo ñuénamona, fia iga raa izóideza, áfena jino uaido jaícina llónidicaiza. Afe caimo dúcaifirenari Juzíñamuina “Iere figura” mai

cai daiilli.

10

Cristo orécamiēna ūlamona Pablo ocuilla rīino ite

¹ Cue Páblodīcūe. Cristo caimo dūecaifiredeza, ūemo jāi afēmīe iere cāmamīeza cue daje izōi izire ōmoimo jīcāitīcūe. Ōmoimo rīire cue ūrīzaībīñeillena ja birui jīcādīcūe. Dāarie cuena uāitatīno bie izōi cue dibēnedo daiīfiredīaīoī: “Pablo ōmoī cīgīri illa llezica afēmīe iere comēcīna mānaidīmīe, mei īadi afēmīe jīca jāīnomo illa llezica afēmīe abido rīire ocuīdīmīena dōbaicaide,” daiīdīaīoī.

² Mei jāīfodo, ōmoī cue erōīzaībilla llezica, rīrede uaina ōmoimo cue ūrīzaībīñeillena izire jīcādīcūe. Mei ōmoīmona dāarie cuemo fiēnīde uai jītādīno ite. Afe īaīoī jītaca uai bie izōi joīde: “Nana īe finōcano daa bīnīe comīnī jītāina izōī finoca,” daiī daiīdīaīoī. Iemona afēmācī cue ūrītāja, rīrede uāillaīdo īaīoīmo ūrīredīcūe. Mei īadi afe izōī cuena ūrītāñeno īrī.

³ Mei uáfueza, ua cómedīcūe, mei īadi bīnīe comīnī fuīrīfīrena izōī fuīrīñedīcūe.

⁴ Fiēnidīfuīaī ōnī cue caitalle raa, bīnīe comīnī fuīrilla raa izōīñede. Mei jāīfodo cue fuīrilla raa Juzīñamui rīinona rīinorede, abī rīīdollena rīire finōcacuaī izōīdena cue tāīnocaitallena.

⁵ Mei āfedo cuemo fiēnī jītācana ōnī caitādīcūe; daje izōī cuena īaīoī cāītajana ōnī fēītatādīcūe. Nana uāītaīacadīno īaīoī abī īīnuano jāīmācī Juzīñamuīna raire ōnōñeillena jīzītāfīredīaīoī. Ie jīra nana īaīoī comēcī faca uallaī Cristo anamo ītātāitīcūe, afe Crīstona īaīoī comēcī jīēruīllena.

6 Cue llógana omoi jíeruilla ñue ícoimo dúcille llezica, nana jáie uáitafiredinona duere fínoiticue, íaioi jíeruiñena ícoinia.

7 Daa jínofene cioide ráaniaimo eróidíomoi; uáfueza, náinidimiena cue eróinamo eróidíomoi. Ninó dámie “Uáfueza cue bie Cristo iédicue,” daííadi, bífuego afémie úbicaitarede: Cristo íena ie illa izói, daje izói cue Cristo iédicue.

8 Mei diga icaiño, cuemo ite ríinodo cue llóíadi nai áferi méaidaiñeiticue. Mei cai Ocuíraima afe ríino cuemo jónete, áfedo Juzíñamui dibénemo ñue omoi cue móonaitallena. Omoi niné cue táinocaitallena cuemo íñega.

9 Fia rabedo ómoína jácidotímie izói íacañedicue.

10 Dárie cue cuezábaido daídíaioi: “Jamánomo riire ocuífired; mei íadi afémie comini eróicana úrilla llezica, afémie ríimieñede. Afe llezica ie úrilla uaina iere jáimairuirede,” daídíaioi.

11 Afe izói úritímie bie izói onótarede: Jicana rabedo riire cue úrilla izói, afe izói omoi cígiri cue ille llezica riire úriticue. Nane afe dáaruído afémacina riire ócuiticue.

12 Afémacimona dáarie dani íaioiena ñue caimare úritiaioi. Táinomo abi ínuado úritiaioi. Afémaci illa izói jaca mamériñedicue. Dani táinomo íaioi comécillado conímamo comécidiaioi. Ñuera come daííllena dani conímamo facádiaioi. Daí fácajama abina onóñedimacina jáidiaioi.

13 Cuemo dúíñede raado abina íñoñeiticue, uai cue llócaillena mózizaillinona llotímie, Juzíñamui. Afémie ñuera uailai cue llócaillena omoi illánomo cuena dúcitate. Uáfueza Corinto dinomo cuena jáitate.

14 Ie jira cuemo dúide táijinafue baimo jáiñedicue. Mei navi Cristo ñúefue fueñe ómoimo jino dénuabiticueza. Iemona afe omoi cígiri cue táijille cuemo dúide. Nano fueñe lluáibiñedicuenia afe táijille cuemo dúide; mei íadi daiñañede.

15 Jiáimaci táijinana cúeiena abimo maiñoñedicue. Afedo abina ínoñedicue. Mei jiáifodo Juzíñamuimo omoi ínogafue ñue móonaille dinori, omoi cígiri jamánomo cue táijillemo ocuáridicue. Mei íadi cuemo dúide táijinafuedo táijifireiticue.

16 Iemona afe méifomo omoi illa batífenemo jica itínomo jíllona uai lluájiredicue. Mei íadi afe llezica jiáima taineca táijinamo táijíñeiticue, ie táijinado abí cue ínoñeillena.

17 Mei jiáifodo daa come abí ínoiacania, cai Ocuárimado abí ínoiteza.

18 Dama ie abido ñue úritimie, ñuera come daiífrenamiena jáiñeite; mei jiáifodo daa Juzíñamui ñue úrillamie, ñuera come dainámiena jaille.

11

Cristo óreñega taino llotino Pablo diga

1 Abina onóñedimie izói due jiza úriticueza. Raire cue uai oñeno fíaicana cue úrillamo ómoína cacáretaacadicue. Mai fíaicana abí cue ínuamo omoi cácarei.

2 Omoína iere uríoifiredicue. Afe omoi cue uríoilla Juzíñamuimona comuide. Dámie ie áireiacania jétañega jitaingo óllena jica ia mámano jicánote. Afe jicánogango daa afémiemo iníreirede.

Mamécaruimo afengo moo aféngona izájite. Afe izói Crístomo ómoína cue izájillena ja Crístodo mamédicue. Ie jira ómoiri iere uríoidicue.

³ Mei comini nánoidingo Evana jαιο bífuiano jífuia izói, afe izói jíaimaci ómoína bífuiana jacíruiticue. Afemona figo abí omoi ráiruiñenia jífuefitiomoí. Iemona Crístomo ñuera comécido omoi comécillana oni jíáfodo féitaitiaíoi. Daje izói Crístona nahí omoi izíruillana féitaitiaíoi. Afena jacíruiticue.

⁴ Cue llócaiga Jesús izóiñedimiena ómoimo llotíaíoi. Afemo fáicana caimare ñue cacáreidiomoí. Afemo nibai omoi inollena jacíruiticue. Iemo nauí ómoimo cue lloga o maiñoca Ñuera Joreño izóiñedena jíáifoide joreña abímo maiñódiomoí. Iemo jíái uícodo cúemona omoi cacana ua jíllona uai izóiñedena jíáifoide uai jeire otíomoí.

⁵ Birui baie omoi cígido jáillamaci “Cai bie Cristo orécamaci baimo ñúemacidicai,” daídíaíoi. Mei íadi afémaci jofófenemo ráifiñedimiedicue, daí comécíoidicue. Iemona ¿nibái mei cuemo cacáreñeitiomoí?

⁶ Mei nibai cue úrilla uai figo jínoñeniadi, nai cue onoiga rafue jino llúana dibénedo iere baitádimiedicue. Nana ómoimo cue llócaillado afe bie cue onógafuiaiina jaca nágarui jino ómoimo ácatafiredicue.

⁷ Jíllona uai ómoimo raiñoñoeno cue llúado, omoi anamo cue abina itátaticue. Daí iticue cue baimo ñúefuedo omoi jalléillena. Daí cue illa ¿nibai fiénide? Daítañede.

⁸ Jiáie Juzíñamuimo jaináidino omoi cue canolle úcube ibádiaioi. Omoi cígiri cue íllena afe úcube cue llínua afémacimona cue bairoca izoide.

⁹ Omoi cígiri cue illa llezica, cue jitaica raana ite. Mei íadi áfena jaca ómoimona raiñóñedicue. Aféruillaído Macedóniamona bite cai ámatiai, cuemo iñede raana fecádiaioi. Afe daí cue abina rairuídícue, omoi cígimo nana cue finócafuiái ómoimo juare zúíñeillena. Iemo nauí cue illa izói, afe izói omoi cígiri jaca daí ífireitícue.

¹⁰ Cristo ñúefue ua cue onona izói, afe izói nane jiáifuena ua onódícue. Afefue bie izói daide: Nana Acaya éniédo raiñóñeno tájifireitícue. Afe cue tájina cue raiñóñenari cáimacaitícue. Iemo afe cuemo ite cáimafue buna cúemona báiroñeite. Afena uáfodo onódícueza.

¹¹ ¿Ñibái mei daí úritícue? ¿Ñibái ómoína cue gáñenado daí úritícue? ¡Ieñede! Ómoína iere cue gáinana Juzíñamui ñue onode.

¹² Mei íadi jaca cue fínua izói finócaítícue, cuena uáitatino abí íñotañeillena. Jaca ómoimo raiñóñeno tájifireitícue, baie abí íñotino íaioi abí ínua raa cue bairóllena. Afémaci úcubena ómoimona izire jicáfirediaioi Cristo ua orécamiena cue illa izói íaioi íllena. Mei úcube íaioi ófirenamo íñotiaioiza, áfedo “Cristo orécanodícai” daíllena. Ie jira afe íaioi íñoga uai oni caitáacadícue. Iemona jaca raiñóñeno ómoína canófireitícue.

¹³ Baie afémaci Cristo óreñega iere taino llotino. Daje izói afémaci jiáimacina jífuefiredino. Iemo jiái afémaci come jífeia jíáifo eroína izói, Cristo orécamacina comínina íaioimo comécítaacadiaioi.

14 Afe bie jíáifodo afémaci eróinafue cáimona jánaiñede, mei dama Taife egáíñote Juzíñamui abi ímiēna eróillena méidoficaideza.

15 Ie jira, Taifemo táijitagano ie méidoficailla izóí méidoficaifirediaioi; afe jíáífoide raa izoiñede. Iemona jífeide come eroina izóí bimaci ñue ite comínina eróillena abina jíáifodo méidotiaioi. Mei íadi íaioi finócaiga fiénidifue dúina dieze afémaci táinocaitiaioi.

Cristo orécamiena ie íllamona Pablo duere zefuide

16 Nane dáanomo ómoina dáititue: Bie jabo abi cue ínuamona cue úrillamona bu cuena “Uáiritaidimiedio” daíñeno iri. Mei íadi daa come daí comécido daííadi, dama uáiritaidimie izóí úriticueza fia omoi eroiri, áfedo jabo abí cue ínollena.

17 Afe bie abí cue ínua uaina, cai Ocuíraimamo ite rínodo cuena daí daítañede. Mei jíáifodo dama uáiritaidimie izóí úriticueza.

18 Mei dani íaioi daina ñuera uaido abí ínotinuiaí aillo íteza; afe íaioi taino abi ínuana izóí, afe izóí abí ínoititue.

19 Omoi zánuaño dáititue, omoi jamánomo baitáinodiomoi, mai uáiritaidimie izóí cue úrillamo caimare fíaicana omoi cácarei.

20 Mei ómoina baie ríire táijitatinona caimare fíaicana cacáreidiomoi. Iemo jíái ómoimo ite raana báiruaíbitino uaimo caimare fíaicana cacáreidiomoi. Iemo jíái ómoina náamataíbitino uaimo fíaicana caimare cacáreidiomoi. Iemo jíái omoi jámairuitinomo caimare cacáreifirediomoi.

Iemo omoí uieóna fatade izóidino, afe ní ómoína fiéni úritinomo fáicana caimare cacáreidiomoi.

²¹ Bie izói cue daina cuena meáruitade, mei íadi dama cue jámairuillado dáitícue, cue bie afémaci fínua izói, cue finóllena figo ríinidícue.

Mei íadi aillo jíáie comíni jacíruiño daiífiréna izói, cue jíái jacíruiño dáitícue, mei íadi áfedo uáiritaidimie izói úritícue.

²² ¿Meita afémaci hebreo imaci? Cue jíái daje izóidícue. ¿Meita afémaci Israel nairai iédiaioi? Cue jíái daje izóidícue. ¿Meita afémaci Abrahámona comuídino? Cue jíái afémaci izóidícue.

²³ ¿Meita afémaci Cristo táijitagano? Cue bie afémaci baimo Cristo ocuícamedicue. (Bie izói cue dánado uáiritaidimie izói úritícue.) Cue bie afémaci baimo jamánomo táijidícue. Cue bie afémaci baimo zéchedogacue. Daje izói afémaci baimo llavécacue. Iemo diga ícaiño titáacagacue.

²⁴ Cinco dígacaiño judío nairai duere cue fínua llezica, cuena zechénotadiaioi. Nágarui duere cue íaioi fínua dáruido treinta y nueve dígacaiño cuena zechénotiaioi.

²⁵ Iemo dacaiñoámani cuena ragüízido fatíaioi. Iemo dácaiño noficiaina cuena níjidiaioi. Iemo dacaiñoámani cue jailla áillue nocáe buide. Iemo dácaiño cai buíllamona daa naio daa mona diga afórede monaillai cígimo iticue.

²⁶ Dáanori uái iño iere macáfiredicue. Iemo diga imani jaciredinuaímo iticue, íemo jacirede merírfiredino cígimo iticue, íemo dama cue comíniri jaciredifuaí cígiri iticue naa jicánemaciri. Iemo áillue jofue cígimo ite jaciredifuaí cígimo

itícue. Daje izóí áillue nairai jinomo ite jacíredifuiái cígimo itícue, íemo jíái monáillaimo jaci cácadícue. Iemo jíái taino ámatíái cígimo jaci cácadícue.

²⁷ Daje izóí juárede táijnamo itícue naa féiredifuiáiri. Diga ícaiño mona naio diga iníñeno táijidícue. Daje izóí iere jufi cácadícue, íemo jíái jainoi inénari duere zefuídícue. Diga ícaiño Juzíñamuimo comeci fácano güíñeno jáicadícue. Daje izóí rólliemo duere zefuídícue. Daje izóí inícuironino jáicadícue.

²⁸ Nane bífuiái baímo jíáifuiái cuemo comuide. Nágaruillaido náganuiáimo ite Juzíñamuimo jaináidinomo cue comeci úicaide. Iaióina abíoidícue izóí duere zefuídícue.

²⁹ Iemona daa come figo Juzíñamuimo ie íñoñenamona duere zefuíaí, afe cuena duere zefuítate. Daje izóí dámie íaífuemo comeci nine féiacaniadí, cue comeci niné féizailla izoide. Iemona afe cuena meáidaitade; daje izóí cuena ríicaitade.

³⁰ Mei afémaci táinodo cuena abí ínotaadi bie izóí dáitícue: Cue mairíñenana jino ácatate raado ñue cue úrillena baímo gáidícue.

³¹ Cai Moo Juzíñamui bie cue daína ua uaina onode. Afémie cai Ocuíraíma Jesucristo Moo; íemo jíái afémie jaca ninomo ióbioitaregaza.

³² Naui Damáscomo cue illa llezica afe nairai jabóidíllaíma naga nazemo úíñorainína jónete, llaitada cue llavéllena. Afe nairai nahíllaíma Areta mámeciredímie.

³³ Mei íadí jíáie Juzíñamuimo ínotino, eróirafomona cirígaido cuena ana agüínetiaíoi; mei afe jofue onífene cirínua raa caífo jíicado íteza.

Daií afémacimona botada jíllo dicue.

12

Juzíñamui Páblomo nicai anado ua ráfuedo úrite

¹ Dáamie dama abido caimare úria minícana oñede. Ie úrilla jiáie raamo ráifiñede. Afefue ñue onódicue ia, cai Ocuíraima nicai anado cuemo ácataga raa jino llóredicue. Afe llezica uícodo nai buna óñoñegafuiai cuemo llote.

² Afe cuemo ácataruimona ja catorce fimona jaide. Aféruimo Crístomo cue jaináinamona caifo tercera monamo Jesucristo illámonamo uigacue. Onóñegaza nibai caana abido uigacue, nibai íeizininino uigacue. Afe dama Juzíñamui onoiga.

³ Cue úinaruimo nibai abí diga uigacue, nibai daa cue joreño úina, áfena onóñedicueza; dama Juzíñamui onoiga.

⁴ Juzíñamuimo ínote tíidino jáillinomo uigacue. Afénomo Juzíñamuimona dama cuemo duide ebírede uáillaina cacádicue; afe uáillaido Juzíñamui rairuídeza birui úrinidicue.

⁵ Afe cuemo ácataga raado abina ínoredicue, mei íadi áfedo abina íñoñeiticue. Dama cue abina íñoñeiticue. Mei jiáifodo cue mairíñenado ñue cue úrilla iere gáidicue.

⁶ Mei dama abido cue úriacaniadi, afe abina onóñeno úrilla izóíñede, mei jaícina uáfueña úriticue. Mei íadi áfedo úriñeiticue, mei cue ciona izóí comini cuemo comécillena jítáidicueza. Afe izóí cúemona íaioi cacana izóí áfeze cuemo íaioi comécillena jítáidicue. Afe baimo aillo jiáiforie cuemo íaioi comécillena jítaiñedicue.

7 Afe cuemo jino onótaga raa iere jamánomo ebire cioide. Ie jira áfedo jamánomo abina cue ññoñeillaena, duere zefuítacue. Afe duere cue zéfuilla come abimo eedo llúina izoide. Afe eedo, Taife come izi cácatate raa izói, cuena duere ññaabite.

8 Bie duere cue zefuilla raa cai Ocuíraima oni oréllena dacaiñoámani íemo jicádícue.

9 Mei íadí cai Ocuíraima cuena daide: Cuemo ite o cue cáimadofirena nana omo comuide duere zefuilla o ocuíllena ñue cánoite. Mei daa come náinina llezica, cuemo ite ñuera ríino afémiedo ñue jino ácatarede,” daide. Ie jira cuena náinitade raari íóbidícue, afe daí Crístomo ite ríino cuedo jino ácatallena.

10 Mei jira cue náininari íóbidícue, íemo comini cuena báíñuari íóbidícue. Daje izói raana cue jitáillari íóbidícue. Afe izói cue duere íaíoi ññoñacanari íóbidícue. Iemo Cristo ícoínia féiredifuiái cuemo comuillari íóbidícue. Mei jamánomo íaíoi cuena uáitaacana llezica, afe llezica Juzíñamui cue cánuado comécina jamánomo íociredimiena jáidícueza.

Coríntomo ite Juzíñamuimo jaináidínomo Pablo comeci úicaifrede

11 Dama cue abi ífuedo cue úricaillamona uáiritaidimiena jáidícue; mei íadí daí cue úrillena cuena ocuíoide izói itíomoi. Mei dani omoi ja birui cuedo ñue úriredíomoi; mei ráifiñedícue ia, omoi cígido jaide Cristo óreñega jamánomoidino jofófenemo ráifiñedícueza.

12 Naui omoi cígido járitaiñeno íaícaana táijidícue. Afe cue táijicaillarumo jíáiena onótate raana

finódicue naa cíorainina ráaniairi. Afe dáaruido ebire cáimacaitate ráaniaina finódicue, nana bífuaido Cristo ua orécamiedicue daiíllena.

13 Jiáie Jesumo jaináidino cigiri cue illa llezica, cue jitaica raana raiñódicue; mei íadi omoi cigiri afe izói iñédicue. Daa bífuedo jiáie ínotino jofófenemo ómoimo comécidicue. Afe ómoimo cue raiñóñena dibénedo ómoimo fienu cacáiadi áfemona meine caimare cue uáidori.

14 Ja birui dacaiñoámani omoi cue eróizabillena finóbicue. Iemo omoi cigimo cue íllena ómoimo juare fínoñeiticue; mei ómoimo ite úcube cúeiena máíñuaibiñeiticueza. Mei jiáifodo dani omoi Juzíñamuimo ñue jaináitallena bíiticue. Mei uafue, éicomini úruiai íena úcubena ofítarena. Uruiai ie moo íena ofítanide.

15 Omoi comeci ñue íllena dama cuemo ite diga caimare fúitaiticue. Daje izói ómoiri cuemo ite máriena jeruíñeno fúitaiticue. Omoína jamánomo cue izíruiadi ¿afe íbana meita omoi jofófenemo cuena izíruiaredi omoi? Daiítañede mei íadi birui afe izói ómoimona dáarie cuena daií finódiaioi.

16 Nana ómoína cue llótai duabiñedicue. Afena ñue fairíotio moi; mei íadi afe méifomo dámierie jiáifodo daiídiao: “Irebaimo jiita izói caina bífuiano úcube ote,” daiídiao.

17 Naui ómoimo cue orécamacimona, ¿meita cuemo izájillena dámie ómoína bífuiano úcube ote? ¡Oñedel!

18 Omoi méiñuaillena Tito izire jicádicue. Afémiedo daa jiáie ama orédicue. ¿Meita afe Tito úcube óllena ómoína jífujete? ¡Daiítañede! Tito, ie nabai, íemo cue, cue macáfírena izói, daje izói

nana macádicaí, ¿ero ua? Dájena ñue comécillado táijifiredicaíza, ¿ero ua?

¹⁹ “Caído abi ríidotio,” nibai caina comécido daídíomoi. Mei íadi afe izói jóíñede. Mei jíáifodo Juzíñamui eróicana Crístomo jaináitagamie izói úriticaí. Mei cue izíruiga ámatíaidíomoi za, nana bie izói cue daína omoi comeci Juzíñamui dibénedo ñue móonaillena lloticue.

²⁰ Mei omoi diné cue bille llezica cue comeci óiacana izói iñédíomoi cue cíozai billena jacíruiticue. Iemo afe íbana omoi comeci óiacana izói iñédicue cue omoi baizájillena jacíruiticue. Iemo dájena ñue omoi jaináíñenamo jacíruiticue. Daje izói omoi íradoifirenamo jacíruiticue; íemo jíáimana omoi ícifirenamo jacíruiticue. Iemo afe llezica jíáimana duéruiñeno daní abí omoi úicoficaillari jacíruiticue. Iemo jíáima uaita uai omoi llófirenari jacíruiticue. Iemo jíáimaci jánari omoi úrifirenari jacíruiticue. Daje izói fieni abí omoi ínofirenari jacíruiticue. Iemo ocuícana náfueñedino izói fieni ebena omoi ífirenari jacíruiticue.

²¹ Iemo jíái uire omoi cue éroizai bille llezica omoi daí íllari cue Juzíñamui ómóido cuena meáidaitalleri jacíruiticue. Iemo afe llezica nibai aillo ómoiri cue éeiri jacíruiticue, mei jaiái ninómona diga fiénidífuiaí omoi fínuari éedicueza. Mei ómoimona aillo nai íaíoimo ite íaífuiaí féitañediaíoiza. Daje izói íaíoimo ite jíruífuena fáicanocaiñediaíoí, íemo íaíoí comécina jírioidé fieni finócafuaí oni nine féitañediaíoí.

13

Pablo úraicaiño íaioi uáidua uai, íaioi mo llonódacaiga uai diga llote

¹ Naui ménacaiño omoi méiñuaidicue. Ja birui nane meine omoi méiñuaibitícue. Onódiomoiza, naga júfidoga rafue mena, nibai daámani uai nabáiraini daje izói úriadi, afe júfidogafue ñue záide.

² Naui méifodo omoi cue méiñuaibilla llezica, nana naui uícodo fieni itínona duere cue finóllena llonódacaidicue. Birui benó jica cue illa llezica dáanomo naui ómoína dama cue dáinana llóitícue: “Úire nane omoi cue méiñuaibia naui uícodo fieni itínona naa ómoiri dúecaiñoeno duere fínoitícue,” daidicue.

³ Iemona omoi jenoca Cristo cuedo úrilla onótafirena raana ñue ónoitiomoi, mei áfena jenófirediomoiza. Omoiri Cristo náinidimie izóiñedeza, afémie ríinorede, Cristo omoi diga jifánoñedeza, ríiredimieza. Omoína ñue rairuíoide. Omoi cigiri íemo ite ríino jino cíotate.

⁴ Uáfueza, Cristo náinidimie izói cruzmo coraica, mei íadi birui afémie Juzíñamui ríinodo caade. Afe daí Cristo náinina izói dájena náinidicue, mei íadi dájena afémiemo cai jaináillado Juzíñamui ríinodo íitícue, omoi ñue cue finófireillena.

⁵ Mai dani ñue abina omoi onoiri. Afemo, mai ñue comeci omoi facari, Juzíñamuimo ñue íinoga uai íere jeire omoi úana omoi onóillena. Omoi comeci ifue facada ñue jóonefireiri. Jesucristo ómoiri íllamo ¿meita áfemo comeciñediomoi? Mei nibai jáífodo jóide. ¿Meita táinona ínotiomoi? ¡Afe daí íñeiteza!

⁶ Mei uáfueza, cai bie táinona llotímieñedicue. Afemo ñue omoï comécioicaillemo ocuridicue.

⁷ Iemo afe llezica fiénidifue omoï fínoñeillena Juzíñamuimo jicáfiredicue. Daa ñúefue dibénemo omoï íllena jicádícue. Mei íadi ñue jaícina llófuefiredimie cuena daíllena jicáñedicue. Dámie “Jaícina lloñédio” dáíadi áfena llóñeiticue. Ñúefuemo omoï ille comini cueri dánana baimo ráfide.

⁸ Jaca ua uai jeire omoï oíadi úaitañeiticue; ómoína lletánidicue. Mei jíáfodo afe uaina nabáiredicue.

⁹ Ie jira ómoína cue lletáninamona náinina cue cíoiadi, áferi caimare íóbidicue, mei afe llezica omoï ñue comécina náirediomoiza. Iemo nífuenino ñue jaícina omoï íllena jaca jicáoifireiticue.

¹⁰ Nai omoï cue méiñuaibiñena llezica, bibe uícodo ómoímo cueticue, uire ómoímo cue bíadi omoï diga riire cue íñeillena. Uáfueza, omoï riire cue lletalle ríino Juzíñamui cuemo iga. Mei íadi omoï cue táinocaitallena cuemo íñega. Mei jíáfodo Juzíñamui dibénemo omoï comeci ñue cue móonaitallena cuemo iga.

¹¹ Cue ámatiai, ñue ítíomoiza. Dani nífuenino jaícina omoï illínomo omoï coméciri. Bie ómoímo cue lloga uai náfuiano, conímana omoï náicaitafireiri. Conímamo dájerize caimare omoï comécifireiri. Daje izói jíái dájena ñue uái illífue comuítate Juzíñamui omoï diga ífireite, íemo ómoína ie izíruifirenana ónoítíomoí.

¹² Caimare conímana omoï uáidori.

13 Nana benó ite dájena Juzíñamuimo íinote cai ámatiai ómoimo uai orédiaioi.

14 Ja birui cai Ocuíraima ómoina ñue fínoiteza. Daje izói Juzíñamui ómoina izírui fireiteza. Iemo Ñuera Joreño ómoina nabáioicaiteza. Daiítadeza. Jae ñie.

Juziñamui Ñuera Uai
New Testament in Huitoto, Minica

copyright © 2011 Wycliffe Bible Translators, Inc.

Language: Minica Huitoto (Huitoto, Minica)

Translation by: Wycliffe Bible Translators, Inc.

Copyright Information

© 2011, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Huitoto, Minica

© 2011, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

PDF generated using Haiola and XeLaTeX on 18 Apr 2025 from source files
dated 29 Jan 2022
740f11a2-2e26-57f5-a3a7-5deb2d20bd24